

...d'û mèste ta gnaute, d'û biladye entau besi, qu'abè debarat la balée dingu'à l'arribère d'Aulourou. Bou maynat, susmetut e balént, biste que gagnè de bounes soutades. Touts lous paysas qui-u counechèn que l'aurén boulut, més Manoèl n'ère pas auserè e, sèt ans a que serbibe enço d'û hort paysa de Louteyre, coumune toucante de Sen Roumas. Estaubiant, qu'abè amedat papès de mile, ét tout soul que sabè quoans. Qu'ous estuyabe en û coufret de hère debat de la pelhe, au houns de la soue male, e bèts cops, ta s'assegura si nat e mancabe, qu'ère lou sou mey gran plasé dous tourna counta. D'esta baylet toute la bite, Manoèl n'abè pas l'ahide. Qu'auré boulut croumpa-s û endret, marida-s tabé, e de l'estat de baylet passa tau de mèste. Be s'at abè pla meritat. Més ta-s hica à case, ta s'aquipa d'utis e de bestia, n'abè pas prou de sos.... Marthe de Hique qu'abè pergut l'òmi despuch û an e miey e qu'ère demourade soulete dab dus chins qui abèn adare, Yanete cheys ans e Armand quoàte. Yoéne encoère, tant per tant s'abè yuntat lous bint e sèt. Qu'escoutè lous abis de Madelène, l'amigue qui-u bienè ha soubent coumpagnie despuch lou sou malur e, maugrat de la bergougne qui-u gahabe bèt cop en pensan au defunt, qu'arcoelhou toutu lou pretendut chens se ha trop estira.